

陳母廖太夫人家傳

湘潭袁思亮撰

廖太夫人長沙人也父諱紫嵐母金隆禮善教德容言工備於在室年若干歸同邑贈資政大夫陳君諱星暢贈公世父早卒無子以贈公後所後母姚太夫人與本生母余太夫人猶同居太夫人日侍兩姑間揣色摹聲先意適志兩姑益交歡已而余太夫人連有喪子之戚得療疾羹湯藥餌扶持抑搔太夫人與娣姒均其勞贈公性剛易怒太夫人因事喻情委曲譬導往往得解教敕子女依於義方孩提之童無敢出惡聲者貌溫而恭不苟笑言孝謹柔嘉獲於帟幃信於閨闈格於門內莫不和順

祇肅贈公遠客閩隴積歲不歸有家之責一以相委節嗇纖細
躬肩其劬布衣疏食無俾匱乏歲時賓祭致其豐潔尤力督諸
子於學不使以有無攪心蓋事姑承夫育子女持門戶敝精罷
神幾二十年卒以致疾不起春秋三十有八耳子幾人長繼訓
光緒甲辰進士官度支部主事軍餉司司長調署駐俄參贊而
畢業明治大學候選州同曰熙訓者其季也女幾人適某某孫
幾人長縉新化縣知事次次庠湖南大學教授曾孫幾人繼訓
幼得肺疾幾殆太夫人手調藥熨治之竟癒家貧共啗粗糲偶
得肉必以食繼訓曰子女均也吾非私兒兒體羸又最長吾冀

及吾之生見兒之成立也其後繼訓發奮成進士爲京朝官而太夫人不及待繼訓語及未嘗不流涕云太夫人以繼訓貴逢覃恩初贈恭人晉贈夫人

袁思亮曰繼訓與余同舉癸卯鄉試又同官京師相善也狀太夫人事乞爲傳刊家乘於太夫人之不逮養有深痛焉嗚呼爲人母而不冀其子之成立者非人情也彼膺八座之封隆五鼎之養者誠極一時之遭而不幸終不一酬者可勝道哉葬以土祭以大夫永慕不忘徽載用昭其亦可以無憾於冥冥矣